

REGIONAL NEWS

HEADLINES:-

1. Larsap Pu Indra Sena Reddy Nallu chuan Sairanga FCI Godown sak hna chawlh lailawk mek chungchang chinfel theih dan tur a ngaihven.
2. Chief Minister Pu Lalduhoma leh State Transport Authority-ten Mizoram chhunga khualzin phur lirthei tih hmasawn dan tur an sawi ho.
3. Vawiin khan Jammu and Kashmir leh Haryana Assembly inthlan vote chhiar a ni a, Haryana-ah BJP leh Jammu & Kashmir-ah Congress leh an thawhpuiten sawrkar an siam dawn.
4. President Draupadi Murmu-i chuan vawiin khan film lama chawimawina sang ber Dada Saheb Phalke Award chu Mithun Chakraborty hnenah a hlan.

<><><>

GOVERNOR

Larsap Pu Indra Sena Reddy Nallu chuan Sairanga FCI Godown sak hna chawlh lailawk mek chungchang chinfel theih dan tur Land Revenue & Settlement, Environment, Forests & Climate Change leh Food Corporation of India hotute vawiin khan a sawipui a.

Larsap chuan hmasawanna ruhrel pawimawh siam a nih hmian nakin lawka harsatna a awm loh nana fimkhur tlan a tul thu sawiin, hemi kawngah hian a kaihhnawih department hrang hrangte inkarah thawhhona tha a awm a pawimawh a ti a. FCI Godown chu Mizoram mipui tana pawimawh tak a nih avangin Sawrkar laipuiin a phut angte pawh a ranglama bawhzuia chinfel thuai tum tur leh, FCI Godown sak hna tawpsan lailawk chu tan leh thuai a nih theih nana tan la turin official-te a chah a. Project tan tawh leh kalpui mek, engemaw rokhawlhna avanga tawp lailawkte chu chinfela zawhfel thuai a tul thu a sawi bawh.

He hunah hian Sairanga FCI Godown sak hna kalpui tawh dan leh thlen chinte, Forest Department atanga Riverine Reserved Forest tia tawpsan rih tura hriattirna pek chungchang leh Ministry phut anga hmalak ngaite sawiho a ni a. Hemi atana Compensatory Afforestation tur ram dawnfel a nih tawh thu tarlan a ni a. FCI Godown sak mek chu project pawimawh tak leh Mizoram tana tangkai tur a nih avangin tikhawtlai zel lova puitlin thuai a nih theih nana hmalak ho dan turte pawh sawiho a ni.

He huna tarlan a nih danin Sairanga FCI Godown sak hna hi kum 2021 vel khan Supply Department ram Hectare 3.1 vela zau hawhtira sak a ni a. Buhfai Metric Ton 10,000 leng thei tura ruahman a ni a, building pathum sak tur zingah buhfai Metric Ton 5,000 leh Metric Ton 2,500 leng building sak hna zawhfel thawkhat niin, Metric Ton 2,500 leng building pakhat leh a kentel pawimawh dangte sak hmabak a la awm a ni.

MYC

Mizoram Youth Commission Chairman Pu Malsawmzuala Ralte chuan, Mizo thalaiten hna an hmuh theih nan theihtawpa hma an lak thu a sawi.

Vawiina Akashvani Corresponent nen inkawmnaah, Mizoram Youth Commission Chairman chuan he thu hi a sawiin, MYC office hmun pui chu MINECO Aizawla a awm thu leh District Office Lunglei, Siaha, Serchhip, Kolasib leh Champhai-ah te an neih thu a sawi a, MYC chuan Mizoram Sorkar-in a hna a lak thin Group A leh B exam atan Mizoram chung District hrang hranga an office-ah te coaching center an bun thu leh, Aizawl center-a Mizo thalai coaching an pek mek mi 281-te chu ni khatah tum thum class an neih pui thin thu a sawi bawk.

Pu Malsawmzuala Ralte chuan Mizo thalaite zingah All India Service a lut an awm theih nan Mission UPSC chu tha thlah lova an kalpui thu leh UPSC Preliminary Examination-a tling Mizo thalai pathumte chu exam an hmachhawn tur atana pawimawh, zirlaibu man an ngaihtuah sak thu sawiin, interview an hmachhawn thei a nih pheih chuan Mizoram atanga an kalna leh an rawn haw na bakah a hmuna an senso zawng zawngte chu Mizoram Youth Commission-in a tumsak tur thu a sawi bawk.

MYC Chairman chuan, Mizoram Youth Commission kaltlanga India ram pawna Mizo thalaiten hna an hmuh theih dan tur chungchang pawh sawiin, Mizo British Sipai tang lai te nen an thawh ho thu leh MYC kaltlangin Mizo thalai mi 240 te chuan British Army-a tan dilna form an theh lut tawh a ti a, Mizo British sipai tanglai te hian United Kingdom-a Mizo thalai British Sipai-a intlarten address an pek turte leh physical test an neih huna an thlenna turte an lo ngaihtuah sak thu a sawi bawk.

<><><>

CM

Chief Minister Pu Lalduhoma leh State Transport Authority-ten Mizoram chungka khualzin phur lirthei tih hmasawn dan tur an sawi ho a.

Vawiina Chief Minister hova a pisa a STA thukhawmte hian hma thar lak dan tur ruahmanna an neih Online Cab Booking System chungchang te, Aizawl khawpui chungka Maxi Cab lut thin rel fel chungchang te, Maxi Cab service tam ber Sumo chu Tata company ten an siam tawh loh avanga Thingtlang Bazar Bus Mizoramin a uar thar leh dawn ni a an hriat thu leh chutiang hun a lo thlena inbuatsaih dan tur te Chief Minister hnenah hian an thlen a, Chief Minister ho hian Online Cab Booking system chu buaipui hmasak ni se tha an tih thu an sawi bawk.

Vawiina STA ten Chief Minister an hmuhna hunah hian Pu K. Sapdanga, Home Minister, Pu Vanlalhlana, Transport Minister leh Pu B. Lalchhanzova, Supply Minister te pawh an tel a ni.

<><><>

STATION DIRECTOR RTD DIED

All India Radio Aizawl Station Director hlui Pu Lalchungnunga Sailo chu vawiin chawhnu dar 12 leh a chanve khan a thi a, kum 80 a upa a ni.

Pu Lalchungnunga hi cancer natna avangin damdawiin hrang hrangah enkawl a nih hnuah vawiin khan Aizawl Hospital ah a thi a, a ruang hi a chenna in Aizawl Mission Vengthlangah lak a ni a, naktukah vui a ni ang.

Pu Lalchungnunga hi kum 1976 khan Shillong All India Radio (AIR) Station ah Mizo Announcer atan lak a ni a. Kum 1979 khan UPSC exam pal tlangin Programme Executive atan thlan a ni ve leh a. Kum 1993 ah Assistant Station Director ah kaisangin kum 1998 kum tawp lamah Station Director ah a kai sang leh a. He hna hi kum 12 aia rei mah a thawh hnuin, kum 2011 March thlaah khan AIR, Aizawl Station Director niin a pension a ni.

A service kum 34 vel chhungin Shillong ah kum 21 a awm a, AIR Lunglei ah te, Itanagar ah leh AIR Aizawlah te a thawk a ni.

Pu Lalchungnunga Sailo hian a nupui Pi Saithuami Sailo leh a fate 3 a kalsan a ni.

<><><>

SHC CANDIDATES

Sinlung Hills Council inthlan thlaleh ni 5-a neih turah vawiin khan Congress in an candidate tur te an puang ve leh a.

Congress Candidate te hming hi vawiin khan party President Pu Lal Thanzara'n Congress Bhavan ah a puang a, bial 12 awmah a vaiin an chuh vek dawn a ni.

Pu Lal Thanzara chuan Congress chu remna leh muanna duhtu an nih angin an sawrkar laiin HPC(D) te nen inbia in kum 2018 ah silai an tung a, remna leh muanna awmin Sinlung Hills Council alo pian phah tih a sawi bawk.

Nimin khan ZPM leh MNF te chuan an candidate tur an puang a, ZPM hi HPC Party nen thawkho in bial 12 awmah ZPM in bial 8 chuhin HPC Party ten bial 4 an chuh dawn a, MNF leh a thawhpui Hmar People's Convention (Reformation) chuan bial 12 chuhin MNF in bial 10 ah candidate an siam a, HPC-R ten bial 2 an chuh dawn bawk a ni.

Sinlung Hills Council inthlan hi kil 3 a chuh tura ngaih a ni a, ZPM, MNF leh Congress bakah party dang din tum hriat a nilo a, BJP President Pu Vanlalhmuaaka'n search committee an din tih sawiin candidate duh ang an hmuhloh chuan an ding dawnlo a ti a ni.

<><><>

TB FREE WORKPLACE

Health Minister Pi Lalrinpuiin National Health Mission hnuai hmalakna pakhat, 'TB Free Workplace Initiative' chu Mizoram Sawrkar office-MINECO ah vawiin khan a hawng a.

He hun hi Chief Secretary Pi Renu Sharma, Health Secretary Pi Sangchhin Chinzah leh NHM Mission Director Pu Eric Zomawia te bakah Health & Family Welfare Department a thawktuten an hmanpui a ni.

Khawvel pum ah TB umbo beihpui thlak mek a ni a, Kum 2025 ah chuan TB natna tihrem hman tumin kawng hrang hranga hmalak a nih tawh hnuin 'TB Free Workplace Initiative' hi tun tum a hmalakna turin duan thar a ni leh a ni. He hmalakna kaltlang hian thawktute chuan dam lo leh TB inringhlel te chauh endik tawh lovin, mipuite chu an hnathawhna hmuh ah kal chilh a, a duh apiang tan a test kalpui tum a ni.

He hmalakna hnuai ah hian 'Portable digital X-ray machine' leh AI assisted diagnostic software hmangin TB vei leh vei loh hi Doctor ten rang takin an endik nghal thei a. Vawiin ah pawh nilengin MINECO ah chuan a duh apiang tan a free in test hi an kalpui a, hnathawhna hmun hrang hrangah pawh la kalpui zel tur a duan a ni.

<><><>

COUNTING OF VOTES

Vawiin khan Jammu and Kashmir leh Haryana Assembly inthlan vote chhiar a ni a, Haryana-ah BJP in a term thum nan sawrkarna an siam leh dawn a, Jammu & Kashmir-ah Congress leh an thawhpuite an sawrkar dawn. Hriat theih chinah Haryana-ah hian BJP in seat an lak tawh leh hma an hruai mekna hi 48 a ni a, Congress in 37 ah hman an hruai thung a. INLD in seat 2 leh midangin 3 ah hma an hruai a ni. Sawrkarna siam turin member 90 awmnaah 46 chan a ngai a. Hetihlai hian Jammu & Kashmir-ah chuan Congress leh National Conference tangdun ten seat an lak tawh leh hmahruai mekna hi 49 a ni a. BJP ten 29 ah hma an hruai a, PDP in 3 ah leh midangin 9 ah hma an hruai a ni.

Jammu and Kashmir-ah hian candidate 873 an awm a. Counting center 28 siam a ni a. Assembly bial 90 ah tun September ni 18 leh ni 25 ah leh October ni 1 ah te vote thlak a ni a.

Haryana ah hian Counting sentre 90 siam a ni a. Assembly member 90 thlang turin tun thla ni 5 khan vote thlak a ni thung.

<><><>

FILM AWARD

President Draupadi Murmu-i chuan vawiin khan film lama chawimawina sang ber Dada Saheb Phalke Award chu Mithun Chakraborty hnenah a hlan. National Film Award vawi 70-naah hian film lama chawimawina chi hrang hrangte sem a ni a. Heng zingah hian Best Actor chawimawina hi Rishab Shetty hnenah hlan a ni a, Best Actress hi Nithya Menen hnenah hlan a ni baawk.

<><><>